

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Lengpui khaw dai, Pukpui tuikhawhthla bula lung tla-in lirthei pakhat a delh avangin a hmunah mi 3 an thi a, mi 1 na takin a hliam.
- 2. Aizawl-Thenzawl-Lunglei ATL Road siamna sum dah phut-a lungawilohna lantir mek Lunglei MZP chuan Sorkar in duhthlan tur thil chi hnih a pek chu invaunaah ngaiin Kawng dan chhunzawm zel nise an ti.
- 3. Rafale Marine fighter thlawhna 26 lei turin India leh leh France ten inremna an ziaak
- 4. India chuan Pakistan Youtube channel 16 tihchhuah a khap.



LENGPUI ACCIDENT

Lengpui khaw dai, Pukpui tuikhawhthla bula lung tla-in lirthei pakhat a delh avangin a hmunah mi 3 an thi a, mi 1 na takin a hliam.

Vawiin chawhnu dar 3:30 vel khan Aizawl Falkland veng-a cheng Pu Lalrinliana te chhung chu an lirtheiin Lengpui Airport atangin Aizawl lam panin an kal a, Pa ber Pu Lalrinliana leh a Nupui Pi Lungtiawii leh an fanu Vanlalhruaii te hi a hminah an thi nghal a, motor khalhtu an fapa Lallawmzuala hian hliam na tak tuarin Aizawl Civil Hospital pan pui nghal a ni.

Sairang Police Station atanga kan thudawn lo ngaithla ang.

Aizawl atanga Lengpui Airport panna kawng, Pukpui kham phei National Highway 44A hi lung tlak nasatna hmun a ni a, Rockfall Hazard Rating System (RHRS) ah pawh 500 chuang niin India rama hmun hlauhawm zingah chhiar tel a ni.



WEATHER

Fur ruahtui tla hmasa in, chhiatna hrang hrang a thlen theih avangin mipuite fimkhur turin Aizawl Meteorological Centre chuan a sawi a.

Aizawl Meteorological Centre Director Pu Sudheer Kumar Dwivedi-a chuan Mizoram pumah ruah a sur thei reng a, darkar khata km 30 atanga 40 a chak thlipui a kentel avangin, khawlai leh ram palailenga vakchhuak te thingkung hnuaiah tawmhulna zawng lo turin a chah a, mitinte fimkhur theuh turin a chah a ni.

Pu Sudheer Kumar Dwivedi-a chuan June ni 1 atang hian furpui tak tak chu a intan thin anga ngaih a nih thu a sawi a ni.

<><><>

ATL ROAD STIR

Aizawl-Thenzawl-Lunglei ATL Road siamna sum dah phut-a lungawilohna lantir mek Lunglei MZP chuan Sorkar in duhthlan tur thil chi hnih a pek chu invaunaah ngaiin Kawng dan chhunzawm zel nise an ti.

(BYTE)

MZP te hian vawiin khan Health Minister Pi Lalrinpuui, CM Adviser Pu Lalmuanpuia Punte leh Pu V.Malsawmtluanga ten an rawn biak thu sawiin an thu rawn thlenin an lungawina a thlen lo tih an sawi a, Sorkar in duhthlan tur a pek chu CRRI ten project an siam hunah cheng vbc 44.89 aia tam pawh an pe thei a, a daih bak erawh chu sawi theih anih loh thu an sawi a, a pahnih naah cheng vbc 44.89 chu a pek theih a, mahse CRRI te project a siam tir theih lovang tiin duh anthlang tur a ni an ti.

MZP chuan an resolution ang in pawisa pawhpen dah let leh chu an thil phut a nih thu leh CRRI ten project an siamah an ngaih a ngam lo tih an sawi. Invauna awka ah an ngai tih sawiin naktuk zing dar 7 atangin Hrangchalkawnah duty leh nghal an tum a ni.

Puan tawh angin, Lunglei MZP Headquarters huaihawtin tukin dar 7 atang khan Aizawl atanga Lunglei kalna kawngpui Pukpui daiah dan a ni a. MZP leh a thlawptute hian Pukpui-ah lirthei lut leh chhuak tur an dang a. MZP te hian ATL Road siamna tur cheng vbc 90 leh nuai 69 chu ATL Road siam na’n hman vek an duh laiin cheng Vbc 45 leh nuai 60 chauh dah a Mausein leh Pukpui inkar kawngpui kilometre 14 chin chauh siam na’n Sorkar in a dah chu an hriatthiam loh thu an sawi a, MZP te hmalakna hi Lunglei mipui tam takin thlawpin Maxi-Cab Service pawhin vawiin hian an thlawpna lantir nan an service lo a ni.

Rorellai ZPM Southern Headquarters, Lunglei chuan ATL Road chungchangah chhim lam mipuite rilru natna chu awm an tih thu leh mipui rilru damna tur thutlukna sorkarin a siamsak hma chuan an party pisa-ah hna engmah thawh rih loh ni se an ti a, chhim mipuite beiseina angin ATL road siamna tur ruahman sak thuai turin sorkar an phut tih sawiin April ni 7 khan Lunglei West bialtu MLA leh ZPM Southern Hqtrs-in ATL Road bik enkawl tura an dah Pu T. Lalhlimpaia chuan ATL kawngpui chu ZPM Southern Hqrs anga a mawhphurhna a nih angin sorkarin a siam dawn lo a nih chuan MLA atanga chawlh a hreh loh thu Lunglei leh chhim mipuite’n hriatpui an duh thu an Party chhung inkhawmah a lo sawi tawh a ni.

<><><>

DRUGS SEIZED

Central YMA chuan kar hmasa chhung khan Heroin hawng 460 an man a, hemi kaihhnawihah hian mi 60 man an ni bawk.

Central YMA Kumpulan hmalakna April ni 19 leh April ni 25 inkar khan No. 4 : Hawng - 460, Tictac bur – 107, Alprazolam tablet 10 leh Nitrazepam Tablet 40 man in heng bakah hian Local zu litre 360 bakah Ruihhlo kaihhnawihah hian mi 60 an man tel a, Home leh Ruihhlo enkawlina Center hrang hrangah mi 13 dah luh niin Excise and Narcotics kutah mi 5 hlan an ni a, Counselling class kal mi 37 an awm bawk.

Ruihhlo ven kawngah hian Sawrkar pawhin nasa taka hma la in Excise Minister Pu Lalnghinglova Hmar chuan instagram kaltlangin Excise & Narcotics Department chuan ‘special mobile drive’ neiin, zan lamah Aizawl khawpui hmun hrang hrang tuam chhuakin an duty thin a ti a, Minister chuan Zu leh ruihhlo laka Mizoram a him nan sawrkar chuan theihtawp a chhuah zel tih sawiin Central YMA hnuaia ruihhlo dotute nen tang kawpin a khat tawkin operation an nei thin tih a sawi bawk.

<><><>

LADC

Lai Autonomous District Council a Sakeilui bialtu, ZPM MDC, Pu Tuturu Singh an a chungah thilthleng chu ama duhthlanna ngei a ni tih sawiin, invaubehna lam hawi engmah a awm lo a ti.

(BYTE)

Vawiin khan LADC a ZPM Legislature Party hruaitute P chuan Lawngtlai Press Club ah thuthar thehdarhtute kawmin April ni 23-a ZPM MDC leh ZPM Thalai ten tihluihnaa Pu Tuturu Singh-a hruaikawia, hreng zui ta anga thuthang chu belhchiandawllo a ni an ti a ni.

Lawngtlai-III bialtu MDC, tuna LADC a Executive Member nilai Pu T.Lalengmuana sawi danin, amah leh MDC pakhat bakah ZPM Thalai thenkhat ten Pu Tuturu Singh chu LADC ah Politics buai chho avangin a chungah eng eng emaw a thlenpalh hlauvin an hmu a, thil awmdan sawipui tumin Lunglei bul Sazaikawn bul ah Pu Tuturu Singh-a Chawngte atanga rawnchho nen an intawk a, hetah hian inpawh leh innel takin thu an sawihova, ama duhthlan ngeiin Lawngtlai lam ah an haw ho a, kha thilthlengah khan tihluihna leh invaubehna a awmlova, Lawngtlai ah amah hrengzui anga thuthang awmpawh belhchian dawllo a ni.

Lai Autonomous District Council a ZPM Sorkar chu a nghing mek a, ZPM, MDC pahnih ten BJP zawmin, MNF. MDC 11 leh pawnlam atanga thlawptu Congress MDC 1 nen Member 14 te chuan LADC ah Sorkarna an siamtheih thu Governor ah an thlen tawh a, LADC Sorkar awmzel dan tur hi ngaichan mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

RAFALE

Rafale Marine fighter thlawhna 26 lei turin India leh leh France ten inremna an ziaik. Inter-Governmental Agreement (IGA) hi vawiin khan New Delhi-ah Defence Minister Rajnath Singh leh France Minister of Armed Forces ten an ziaik a. Rafale 26 lei tur zingah hian 22 hi single seat niin pali hi double seat a ni a. Indian Navy te mamawh dan anga siam danglam a ni dawn a. Kum 2030 ah heng thlawhnate hi lo thleng kim tura inrem a ni.

<><><>

PAKISTAN YT BANNED

India chuan Pakistan Youtube channel 16 tihchhuah a khap. Heng channel zingahian Dawn News, Samaa TV, Ary News leh Geo News te an tel a. Heng Youtube channel te hian Pahalgam firfiaka chetna chungchangah thudik lo an thehdarh avangin tihchhuah khap an ni a. Union Home Ministry thurawn angin social media-a thu dah pahnih pawh tihbo a ni bawk.

BBC in Pahalgam firfiaka chetna chungchang a puan dan pawh sawrkar laipui chuan a duh loh thu sawiin ramchhunga BBC hotute hnenah an lungawilohna hi thlen a ni tawh a ti a. BBC hnenah hian firfiakte helho tia puan an ni chu sawrkar chuan a dem hle tih a tarlang a. BBC thupuan hi External Affairs Ministry chuan a vil reng a ni.

<><><>